

GOSPEL TANGKOU

(GOSPEL HERALD)

Issue No. 6

Volume: XXXIX

JUNE: 2025



KUM THUPI
“Na Gam Hing Tung Hen”
(*Mathiu 6:10*)



EDITOR:
RT. REV. KHUP DO KHEN,
BISHOP

EDITORIAL BOARD:**Editor**

Rt. Rev. Khup Do Khen Bishop

Mobile: +919612388924

E-mail: khupdokhen@gmail.com

Join Editor:

Rev Suanboi Tungdim, Director of Ministries

Mob: +918837008618

Email: suanboi@gmail.com

Managing Editor:

Pastor Dr. M. Kamneithang Zou

Mobile No: +918974609177

E-mail: pastormthangboizou@gmail.com

Contributing Editor:

1. Rev Dr. Hangminthang
Mob: +919612997858
2. Rev. Thangliankham
Mob: +919862830905
3. Rev T. Chinlunmang
Mob: +917630854610
4. Evan. Ginminlun Tawtah
(Youth Promotor)
5. Mr Jangkholen Mate
(Mission Promotor)
6. Nh. Nuamboi
(Women Promotor)
7. Divisional Superintendent teng

Design & Setting:

Upa Khuplajem Guite

Circulation Manager:

Pa Dongzakam

Mob: +919612198903

Upa Tutzamung

Mob: +918731830436

CONTENT

1. EDITORIAL	: 1
2. PENTECOST DAY	: 2
3. HAGAU GAA	: 8
4. CHILDREN'S DAY COLUMN	: 11
5. TATE NI (CHILDREN'S DAY)	: 14
6. FATHER'S DAY COLUMN	: 18
7. PA CHITAH & A MUOPHUONA	: 25
8. PATE NI	: 28
9. WIDOW'S DAY COLUMN	: 30
10. MELC INNSUNG THU	: 31
11. SUUNNA	: 33

Life Member : ₹ 3000/-**Patron Member** : ₹ 2000/-**Kum Khat lah man:**

- i) Khut ah ₹ 200/-
- ii) Dah ah ₹ 250/-

Article zousie Managing Editor leh Editor kung a pieh ding; ahilouleh, Email in melcqrts@mail.com leh WhatsApp tungtawn a zong piehthei ding ahi. A lahman Circulation Manager kung a pieh ding ahi. Tualeh Article kigel zousie Editorte ngaidan ahikim suoh sih hi

Editorial laikung pan



Na Gam Hing Tung Hen

Tami thumna pen Mangpa Pasion leeng gam khu, tulai tahin leitung leh mailam hun a ahing tunding thu toh kisai ahi hi. Jesu Khris ahing peikia nading leh van tha leh leitha ah Pasion in abeitheilou Mangpa Lenggam akiphu khieh theina dinga ithum ding uh akul le poimaw ahi dan agen na ahi ahi. (Kihilna 21:1, enkah in 2Pet.3:10-12; Kihylna 20:11; 22:20). Mangpa lenggam khu tulaitaha Hagau lam a hing kilah khieh theina dinga ithum ding uh ahi. Tambangin, Setan nasep nate suhsiet in ahing um ding ua, chinate damsah in ahing um ding ua, hagau mangthangte hundan in ahing um ding ua, dihtatna thute dopsangin ahing um dinga, tuachin, mite lahah Hagau Siangthou ahing kisun buoh theina dingin, Pasion silbawltheina nahpitah in ahing kihel hi. Pasion gam ahisih leh vantung gam ichi chieng PASIAN in tuhun dongin Setan toh akidou a, Ama thupina leh vangletna leh minthanna gam asuoh sah hi. Tami lenggam ahing piehkhieh na dinga nasa taha panla dingin Mangpan eite ahing han hi. ■

“Innsung nuom ichipen tate a dingin Paradise ahi a, Nute adia Kumpinu ahi na mun ahia, Pate dia Kumpipa vaihawmna mun ahi” - Dr. Dehoam.

PENTECOST DAY

Retd. Rev. Dr. Hangminthang.

Tangtel: “Tualeh Pentecost Ni ahing tun in, a unpi un munkhat ah lungsim munkhat puo in a um khawm uhi. Thakhat in huipi haat taha lang banga ging, Van akipat ahing um phut a, a umkhawmna innsung uh a dim siengta hi. Tuachi’n leite ama leh ama kihawmzah in, meikuong bang in atung uah khat chiet in ahing tuta hi. Tualeh, a unpi un Hagau Siengthou in a dimta ua, Hagau in ahamsah bang bang in hamtuom in ahing hamta uhi... amau hamchiet in a za uhi” (Nasepte 2: 1-4, 11).

Pentecost Kipat dan: Pentecost Kut khu Juda mite Kutpi sagite lah a khat ahia, (Leviticus 23:15-22) a kigen ahi. Tam Pentecost Kut khu Peikan Kut Sabbath ni apat kisim tou, a Ni 50 chinna ahimai hi. Tualeh Pentecost Kut khu Pasian in Sinai Muol a Mosi kunga Daan Sawm apiehni chiemtena (Commemoration) zong ahi. Tam Pentecost Kut khu ei Hattuumte a din Pentecost Ni ichita uhi. Pentecost Ni khu Easter Sunday apat sim a Ni 50na khu ahi. Tukum a ding in May 20, 2018 ahi. Thuhun Lui hunlai in Pentecost Kut chiengin Kithoina chituomtuom a bawl jel ua, khumte khu :1). Halmang sillat, (2). Khelna sillat, (3). Lemna sillat, chite ahi. Tualeh Tami ni khu “*Khawmpi Siengthou*” zong akichi hi.

Hagau Siengthou hing tunna: Pasian in Israelte Kutpi sagi apiehte lah a, Pentecost Kut ni in, a chiemsa (Joel 2:28,29) bangin Hagau Siengthou leitungah ahing sawlsuh hi. Tami toh kisai in theikhel lou diing silkhat a um hi. “Hagau Siengthou hing tun zieh a Pentecost Ni kichi hilou in; Pentecost Ni (Kut) a Hagau Siengthou

“Innsung nuom ichipen Gitta (Vatou) te na ngawn in zong nuom asah namun ahi” - Dr. Billy Graham.

hing tung ahi zaw hi.

Nasepte 2:1- “*Pentecost Ni a hing tun in,*” chia kigen khu Juda mite Pentecost Kut (ni) agenna ahi. Tam Pentecost Ni in, Kum dangdang a ana zah ngaizel bang un, mun tuom leh gam tuom tuom akipat in mipite Jerusalem ah ahing peikhawm uhi. Tuachi mabang in, gingtute zong mun khat ah a um khawm uhi. Tam gingu mun khat a umkhawmte khu, nuajuite toh kigawm in mi 120 apha uhi. Gingtute mun khat ah, lungsim munkhat pua a a um khawm lai un, “*Thakhat in huipi haat tah laang ging bang in, van akipat ahing um phut a, a um khawmna inn sung uh ahing luo dim tahi.*” Tualeh huipi ging bang thawm ging umna lam ah mipite ahing taikhawm ua, gingu 120 te tunga Hagau Siengthou hing tundan, Hagau Siengthou silbawl dan ahing mu uhi. Tami ni a mipi hing peikhawmte khu Jerusalem khomi ngentang ahisih ua, gam 15 apat hing peikhawm, ham tuomtuom

zang ngentang ahi uhi. (Nasepte 2:5-13 sung sim lechin na mu ding).

Hagau Siengthou tundiing genlawhsa ahi: (Joel 2:28-29): “Pasian in A Hagau Siengthou leitung a tuibang a a sunbuoh diing, a hawmzah ding thu kamsaang Joel in anagenlawh sahsa ahi, ahin Joel in ani diing ana gen sih hi. Tam Joel thugenlawh igen toh kiton in theisiem ding a poimaw mama khat a um hi (Joel 2:28-32) sung tang 30-32 thute khu a tung nailou ahi” Mangpa Ni “*Mangpa thangpaina Ni*” hing tunchieng a tangtung diing ahi.

Hagau Siengthou hing tunna: Mipite zah thei diing in huipi laang ging bang in thawm anei hi. Mipite muthei in Meikuong (Fire) bangin akilangh hi. Mipite thei thei diing in ham tuom in thu agen hi. Hagau Siengthou tunna mite khu gingtute ahi. Gam tuomtuom apat hing peikhawmte khu amu tute leh a theipite ahi uhi. Hagau in gingtute a luodim lai in,

“Leitung a guolzawna ding in athupipen, Innsung nuom pen ahi” - Dr. Edmund.

apulam apat entute in a thugente uh amau hamchiet in a za uhi. Tam Hagau tangte lah ah buoina bangma a um sih a, apulam a entute lah ah buoina, ngaidan kibah louna a um hi. Khumi khu “Zukham hiva uh...” achi uhi.

Tuazieh in Peter in a hilchien a, “*Tam mite’n na gintat bang un zu akham sih uhi, Vaihamsang ahipan hi*” achi hi. Tana Vaihamsang kichi khu hun genna ahia, KJV ah “*Third Hour*” achi a Paite Bible in dah kuo (9) achi hi. Vaihamsang ichi khu zingkaal lam dah 9/10 lahvel ahi. Tami thu apat in, khumi hunlai in zu dawnte’n zong zingkaal lam a dawn lou uh ahidan imu thei hi. Tulai in eite lah a zudawnte’n zingkaal bai tahtah in a dawn ua, zuzuate zong thou nailou in ava phoh thu hiel uhi.

Pentecost Ni a hingtung Hagau khu: Gingtute chiemte leh Baptis diing leh Rapture tandong a leitung a gingtute umpi (gingtute sung teen) dinga pieh leh sawl ahi (Eph.4:30).

1. Hamuonpa ahi (Joh.14:26): “*Hinanleh Hamuonpa Hagau Siengthou, Pa in ka min in ahing sawl diing a, Ama’n sil zousie noute a hing hil diing hi. Na kung ua ka gensa thu zousie noute ahing theidoh sah diing hi*”.

Tam Pentecost Ni a hing tung Hagau khu hamuonna hagau ahi a, gingtute’n Ama zal in lungmuonna inei thei ua, shi hamuonna zong inei uhi. Tam leitung genthei leh hasatna mun a, migenthei leh dammaw ma mate zong bang ding a lungmuong tah a um thei uh a diei? ichi leh tam Hagau jal ahi. Tam Hagau zalma in khovel in a mupahlou, vandum khellam hinkhuo khat hing tung kia diing khu imu thei a, ikinem thei hi. Tam Hagau zal in haan khellam ah kinepna inei uhi.

2. Thutah Hagau ahi (Joh.15:26): “*Pa akipat na kung ua ka hing sawl diing, Hamuonpa, Pa akipat a hing pawt thutah Hagau ahing tun chiengin Ama’n ka*

“*Innpen tate a dingin ngaituona kipatna mun, kikhawlina mun, guolzawna kipat khietna mun ahi ding. Nute in tate pen siahup (Magnet) bangin ahup namun hi ding ahi*” - **Ellen G. White.**

tungtang thu a theisah diing hi."

Pentecost Ni a hing tung Hagau khu Thutah Hagau ahi a, Ama phuohtawm in bangma a gensih diing a, Pasian apat amute bou agen diing hi. Tuama bangin, koi zong tam Hagau a chiemte (Baptised) a umte'n thutah hinkhuo a mang diing uhi. Khristian hingal a ut leh theiteng gen a, zuou gen khohsa lou a hinkho mangte, tam Hagau in a teenkhum khahlou, Baptis abawl khahloute ahi. Hagau Siengthou in a teenkhum leh a chiemte mite khu, ahinkhuo uah kikhelna, kilamdanna anei uhi.

3. Mihingte lungsim a thugentu ahi (Joh.16:8): *"Ama (Hagau Siengthou) ahing tun chiengin, khelna thu ah, dihtatna thu ah, vaihawmna thu ah, leitung a siem lou dan atheisah diing hi"*.

Pentecost Ni ahing tung Hagau khu mite lungsim sunga thugentu ahia, khelna

kiphoh dohna inei theina khu tam Hagau zal ahi. I lungsim sung a eima leh eima siemmaw ikitansah theina zong tam Hagau zal ahi. Jesu Khrist hundampa a ipom theina khu tam Hagau zal ahi. Hundam kitheichetna inei theina zong tam Hagau zal ahi. (Rom.8:16). Mihing lungtang khauh tahte nemsah khu Hagau ahi- (Pharao). Mihing zauna a dim zing khat lungmuong tah a um sah jeljel khu Hagau ahi. (Rom.8:15 sim in). Pasian Hagau nasepna pang lou in koima'n mikhiel ahilam akiphoh doh zou sih hi. Pasian Hagau panglou in koima'n Pasian tahina akithei chien theisih hi.

4. Gingtute thutah a puitu ahi (Joh.16:13).

"Hinanleh Thutah Hagau ahing tun chiengin, Thutah zousie ah noute ahing pui diing hi".

Gingtute adin tam ikhosahna uh leitung khu gitlouna leh khelna mun, zuou leh nal a kisolna mun, adih leh dihlou

umlou a kinehsietna mun ahizieh in, Thutah Hagau in ahing pui louleh kivahvai thei zing ahi. Hagau Siengthou in thutah a, ahing pui khu ipoimaw mama uhi. Pasian hagau khu eite puitu diingin amansa ahia, ahin ei gingtute khu Ama pui thei ding a ihinkhuo isuhsienghou zing uh apoimaw masa ahi. Pasian in A Hagau a apui diing mite khu Ama khut sung a kitulutte ahi.

Tam a tung a itahlat tawmnou khatte apat in zong i Mangpa Jesu'n ahing sawl diing Hagau Siengthou ahing tunchienga ahina diing leh a nasep diingte agen hi. Ahileh, Hagau siengthou a chiemte in na umtai? na um nailou leh a hingpui khasih diing hi. Ama chiemte tema apui diing ahizieh in.

PENTECOST MANGHIL THEIDING HILOU

Pastor Angam, Local Pastor HQ. Church

"... Amavang Tunlam a pat thahatna a nakivon masangsie un Jerusalem

khuopi a um zing un, achi" (Luk.24:49).

Pentecost hi 50 Days china ahi. Israelte a ding in Ga masa Kut ahi. Jesu hunlai in Jerusalem chau a Pasian Biehinn um ahizieh in, Bieh "inn umna a pat Pasian thu kihil chiet ding ahizieh in a nuazuite kungah thu ana vaihah hi... *"Tualeh kisiana leh khel ngaidamna khu Ama min in Jerusalem akipat in namchin lah ah gen ahi ding hi"*(24: 47). Tunia nang leh kei a ding a Pentecost leh Jerusalem ni i galdot na ding ua Jesu'n min ngaitah eina nuasie pieh ukhu ahi.

1. Pentecost Ni Hing Tung: A unpi un lungsim munkhat in a um uhi. Tunia gingtute zousien ingaituokhawm ding ua dei umpen ahileh gingtu masa te bang a lungsim munkhat leh thakhat a i um lou uleh ahing tung ding Hagausiengthou itang na ding uai! Nuazui masa ten bang a lungkhat thakhat a um a Hagau siengthou itan ding uh apoimaw pen ahi hi. **Sapte**

"Leitung pumpi khu na gamsung (parish) ahi, na kimvel a umte khu na sanggamte ah" - William Carey.

thupil khat in “*United We Stand divided we fall*” achi hi. Tunia hattomten ingaituo kul leh poimaw ahi tata hi.

2. Vana Pat Hui Hattah, Meikuon Bang Lei (Tongues): Jesu’n ana chiemsa anuazuite kung a pa’n kamin a ahing sawl ding achi khu haguesiengthou khu hui hattah bangin ahing tung a atouna inn uh aluo dimta hi. Nuazui thungai mi 120 te tung ah Hagau Siengthou khu alutung chiet uah a tuongta hi. Meikuong bang Lei (Tongues) a chi hi, mei in thahatna a ensah a, Lei in tumasang a thugen theilou zousien zong gentheina a ensah hi. Tami thahattah sil ni a tung uah a tuon zou in, a phuulou in, Pasion thu ham tuom chiet in ahing gen panta uhi. Ham tuom chiet nam 17 Galilee gam mimol a a koi te un, Pasion thu a genta uhi. Pa Pasion min phat in umta hen.

3. Vannuoi Gamchin A Biehna Lunglutte: Ga masa kut mang ding a gam 17 a pat hing peikhawm ten

Galilee gam mi mawl ten ham 17 a thu kigen a zatah un a lung dong mama ua, bang thu kigen hita chi in aki dong tuota uh hi. Tutung a hing tung ding Pentecost ni zong ei gingtuten eite toh kibang mimawl te tung a zong Jesu’n hagau a abuoh khum nuom nalai ahi. Tu in eiten zong Jesu lam ngat zing lei Aman ana gensa mi zousie tung a ka hagau buohkhum vang, mi hausa mi thupi mi loup kahi chi te lah azong ahin zang thei hi.

4. Hagau Nasep Lamdang: Pentecost ni a Peter thugen ngailou dan “*Nouten Singlamte a na khetbeh uh*” chi thuteng hi tulai Pastor ten kizang hitaleh hing ki satlia siengta va maw? Hinanleh zong Pasion hagau natunga a umpou leh zausin na deibang tah in gen mai in hagau in mite lungsim hei tuoh ding hi. Amavang, hagau natung a a um lou leh gensin tulai Bieh inn lamkai te mi jauhuai atam hi. Peter in hagau siengthou panpina

jal in “Nouten Singlamte tung a na kilbet pa uh” chi khu Pasion in Mangpa Khrist a atunding ahita hi. Na tahsan ua na gintat uleh hundam in na um ding uhi achi hi. Hinlah, Pasion hagau silbawl theinan mite lungsim khoi in mi sangthum zen in Jesu a gingta ua a khelnate uh ngaidam in a um hi. Pasion min phat in umta hen. Nang leh kei gingtute Pasion tate zong tam bang ding in ahing dei hi.

Thukhupsitna: I mai a Pentecost hing tung ding

zong hichin ana vaidawn lei Ama hagau i innsung pumpi’n itang thei diei? Pasion na kichiemna Jawlnei Joel in a ana puong doh ngal a; Ni nunung lamchieng in mi zousie tung a, na tanu, tapa, tangval, na upate u, ka suohpa leh ka suohnute tung a ka hagau buohkhum vang, gingta in Pasion thugen zuou ngailou ahi. Tu hi hagau siengthou hun ahi. Hagau in panpi ding in ahing sui nalai hi. Simtu zousie tungah Pasion in A Hagau Siengthou buohkhumta hen. ■

HAGAU GAA

(Fruit of the Spirit)

- Pastor Dr M. Thangboi Zou

Tangtel: “Hagau gaa te ahileh, Itna, Kipahna, Lungmuonna, Thuohhatna, Zainemna, Hoina, Ginumna, Thunuoilutna, Kidehtheina ahi, tabangte toh kikal dan a um sih hi” (Gal. 5: 22-23).

Thumapui: Tu Kum Pentecost Day zangkia thei dia damna hing pia Mangpa Pasion min ka phat masa hi. Tunia ithupi khu Gingu khat hinkhuo adia apoimaw mama ahi zieh in kikum khawm vai chin, laibu tuomtuom apat kaikhawm in ka hing kisah hi.

“Mihawn lah a I skhosah ua, eima tang in ishi ding uhi” - Robert McKenna.

Sawltah Paul in, tahsalam lunggulna zousie bawllou khu Hagau Gaa khat in agen hi. Aziehpén aman Hagau gaa khat a abuching in a thei ziehin, tualeh Hagau Gaa sieng khu Khristian khat hinkhuo akephoi ahi chiengín ama a um Khrist in gaa hoitah asuo khie a, a gadoh hilou in gadosah zieh a hagau gaa chi'n agen hi. Lai-siengthou a Hagau gaa akigen chiengín, khat (singular) in akigen tangpi hi. A kijawitawnpi, Khristian hoina (virtues) agente (2Kor. 6:6, Eph. 4:2, 5:9, Kol. 3: 12-15 sim be in).

Tamna Hagau gaa chi 9 te khu Hagau khat apat gasuo ahia, apién dan in atuom tuom hinanleh, tamna hagau gaa kuote lah a khat nei a giet (8) neilou chi khu hagau gaa ching zoulou ahi. Tam hagau gaa khu Hagau Siengthou in apui mite apat hing gadoh ahi. Gingtute khu Hagau Siengthou deina banga hin ding, tahsa utnate nusie a, Pasian deina banga hin ding ahi hi (Rom 8: 5-14, 8: 14, cf.

2kor. 6: 6, Eph. 4: 2-3, 5: 9, Kol. 3: 12-15, 2Pet. 1: 4-9).

Tamna Hagau Gaa Chi 9te anuoi a bangin mawltah leh tomkim tah in hilchien vai.

i) Itna (Grik haam in *Agape*): “*Mukia ding leh phattuom na ding ngaituo lou a, mi khat panpi, itna, khuolna, lungsim neina agenna*” genna ahi (Rom 5: 5, 1Kor. Chapter 13, Eph. 5: 2, Kol. 3: 14). Tamna “**Itna**” khu Johan 3: 16 akigen khu ahia, ei mihingte ki itna, unau sanggam ki itna sang a tungnung zaw ahi. Tami khu patat, mukia ding kinemlou a Pasian min a kipedoh a nasep leh hinkhuo zat ahi.

ii) Kipahna (Grik haam in *chara*): “*Itna, hepina leh silhoite tung, kipahna Jesu Khrist a um mite'n Pasian tunga anei uh lungsim*” genna ahi (Late 119: 16, 2Kor. 6: 10, 12: 9, 1Pet. 1: 8, Phil. 1: 14). Tami kho tomkhat sung a kipahna abeipei dingte kigenna hilou in, Pasian toh kinai zieh a kipahna anei ding agetna ahi (Jn. 15: 11, 16: 24).

iii) Kilemna (Grik haam in *eirene*): “*Pasian tunga muonna toh lungnem tah a hinna*” genna ahi (Rom 15: 33, Phil. 4: 7, 1Thess. 5: 23, Heb. 13: 20). Tami kho tomkhat sung a dia kilemna ahisih a, idei zousie Pasian kung a tut a i dei zousie suhbei theina neite a ahi. Kihau, kibuo, gal-le-tuol zieh a kilemna, lungmuonna umсах hilou in, aum masang a suhbei theina zong ahi.

iv) Thuohhatna (Grik haam in *makrothumia*): “*Thuohhatna, lungtha beilouna, lungsim kepzawna te*” genna ahi (Eph. 4: 2, 2Tim. 3: 10, Heb. 12: 1). Tami khu min adihlou a abawlна zieh a thuoh zieh a thuohhatna, tualeh phubala ding zong gellou a, lungnem tah a thuohzou zing theina khu ahi.

v) Hoina (Grik haam in *chrestotes*): “*Midangte lungsim nat ding utlou a, mi zousie tunga lungkhamna piengсах nuomloute lungsim*” genna ahi (Eph. 4: 32, Kol. 3: 12, 1Pet. 2: 13). Tami

khu Mihepisiem leh lungsiet siem chia zong genthei ahia, tualeh thuohhatna toh kizui zing ding ahi. Lungthah beilou, kilemna nei mi, mi lungtahsah theina ding a lungsim a zong gellou china ahi.

vi) Ginumna (Grik haam in *agathosune*): “*Thudih, thutah bou deina leh dihtatna deina, gitlouna muda a, ginumna bou kilang khesa ding*” genna ahi (Lk. 7: 37-50). “*Gamtat hoilou a gamtate thuhil ding, gitlouna ineite kisiempah ding*” china zong ahi (Mt. 21: 12-13).

vii) Zainemna (Grik haam in *pistis*): “*Thuchiem, kilatnate a thumanna, thudihna leh chitahna, midangte muonna leh zatatna muonna lungsim*” genna ahi (Mt. 23: 23, Rom 3: 3, 1Tim. 6: 12, 2Tim. 2: 2, 4: 7, Tita 2: 10). Mi zainemte khu eiten mingol, sep-le-bawl ding theilou dan in akigel hi. Aziehpén amaute khu phunhatlou, abawlkhienla tung a ngaidam

nget ding thaselou, tuate zieh in zainem chin Sawltah Paul in agen hilou hi. Agetnuom dan ahileh, “*mi zumsua lou, lungtha beiloute*” agenna ahizaw hi.

viii) Thunuoilutna (Grik haam in *prautes*): “*Thunuoilutna khu lungthahna munte a thunuoilutna, kipula khietna lungsim*” genna ahi (2Tim. 2: 25, 1Pet. 3: 15). Jesu Khrist etton ding (Mt. 11: 29, Chapter 23, Mk. 3: 5), Sawltah Paul hinkhuo (2Kor. 10: 1, 4-6, Gal. 6: 9), Mosi hinkhuo etton dingin ahoi mama hi (Num. 12: 3, Pawt. 32: 19-20).

ix) Kidehtheina (Grik haam in *egkrateia*): “*Mi khat*

a lungsim ngaituona leh a lunggul silte akepzawna ahi hi. Nichin a siengthouna hinkhuo leh kitenna thuchiemte tunga chitahna leh sienthounate” ahi hi (1Kor. 7: 9, 9: 25, Tita 1: 8, 2: 5).

Sawltah Paul in athuvaiha nukhie pen ah Hagau Siengthou mapuina toh tahsa a tam banga hingte khu dankal ahisih, achi hi. Gingtuten Hagau Gaa te khu ihinkhuo ua a gaa khietna dia ihinding uh khu inichin hinkhuo zatdan uah apoimaw a, hanchiemna (panlana) khu dan (Law) toh akizawplouna ikilatkhietsah ding uh ahi, chin agen hi. ■

CHILDREN'S DAY COLUMN:

GOU MANPHA PEN:

TATE “HAPPY CHILDREN DAY”

Pastor Hausawmlal, Local Pastor, SLG

Litung I khualzin na ua mihing in deileh ngai ki hau mama Lin, zong nei kisawmin lampi tuomtuom apanla in anei jou um a, a nei joulou zong um jel hi, tuate pen ka gou manpha, kata katu khang adie ka bawl chibang ineizel uhi.

“Khatvei chiah Moody a shita chi tanchinbu ah nang sim khe ding nahi ua, gingta sih un, tuani khu hinna tungnung zaw ka zawp ding ni, ka lallukhu khuh ding ni ahi” - **D. L. Moody.**

Ahin mihing pen tam leitung sil (Materialistic) te ah lungkimna bukim a um tuom sih hi. Alexander the Great khovel pumpi la sawm leh Greek leeng thupi mama khat ahi, ashi ding kuan in bang chi agen ei; *“Ka shi chie ka hankuang ninglang tuatua ah ka khut tegel doh khesah unlen tuah zawchie ka nei sa sum te ka luong nang dop na nuanua ua na pai jel ding uhi”*, chin thuvai ha ana nei hi. Tammi’n agen nuom khu khutgua in tamlei tung ah kang pei a khutgua ma in ka kileh a, ka kengthei bang ma ah um sih achi nuom na ahi.

Tambang ki hilehtah ahi mihingte pen bang chituh a sil ibuaipite ikeng thei ding uh leitung sil khat zong a um sih hi, ahin i kengthei uh leh isep gimna gaa manphatah itang thei ding uh khat a um hi,, tuami khu i Tate uh ahi. Azieh pen Tate khu igou tan dihpen uhi (Late 127:3). Pasion in eite kung ah gou ang pieh um sunsun khu

Tate ana hi. Tua zieh ma in Mangpa Jesu in Lei a nget thei goute nakhol sang un van ah na gou uh ki kholzaw un ang chi hi. I gou umna a ilungtang um chi gen inei jel pen uh thudih tah ahi, miching in ta-leh-nau ang neileh atate ma hi alungsim lua dimpen.

Ahin tuni ilungsim tongtatah ah igou itate a um na nei? Umna va ahin bangtan ading a um ei? Khatvei chie ei hing en kholtu ding leh hing vatuh kie ding ite-ivuo i chie chitan maimai a buai pi ah a leitung a education bou ah ki pumpiehte ihi kha uai? Tuah ahilou leh ka gou manpha pen ahi Pasion hing pieh ahi tuah zieh amau te ahi khatvei chie Jesu van a ka lamdoh pi dingte chin a hagau hin khua dingte zong napitah a buaipite ihi na uai?

Gou kichi pen a kemtuh a napita in ana ki nga ahi, amanpha ding leh manphalou ding khu, tunie tate gou chie ei mihing pilna

bep toh thunun ah leitung hinkhua ding bou a peipi khate ihi uh leh khatvei chie a gou suuntuh leh kaapi tuh kihi kha ding ahi. Tua bang ihi lou na ding in Manpa lampi dih ang ko muh tah hi, tuami khu Kei toh hing ki lam khawm un ang chi hi, **Late 127: 1** *“Mangpa’n inn alam sihleh alam miten asemgin thawn giap uhi, Mangpa’n Khopi aven sihleh aveng mite ahah thawn giep uhi”*.

Tam leitung a gou nei thon ki tam thei mamah hi, bang zieh e? ichile Mangpa toh ana lamkhawm khalou zie ahi. Tuazieh in tuni Tate Ni kipahtah a izat lailai un i tate khu amasa pen in Pasian toh lamkhawm zing ding ahi dan geltha kie in lung kielou in pan la va ui, **Psychologist** ten, tambang gen ana nei uhi; *“Naupang khat in sil khat ang zuitou na dingin atompem in 25vei bang akibang hinapi genpi jou ngai chi va yia uhi”*. Tamna imu khu kukal leh

lung kelou ah gou ahina akikep dan in akilang hi. Neunou deh! gige deh! chie phunphun sang a lungnem tah leh kisumjou tah asil zuiding leh bawl lou ding a ideite khu genpi jou a ngai mama hi.

Tate kichi khu numei khat leh pasal khat kiteng un, kipawl khawm zieh hing pieng ahi vot sih a Pasian apat kepding a pieh na ki hizaw hi. Tam bang value neita ahidan leh ei mihing bawl thuthei lou ahi dante thei siamlei i gou zong manpha in akep zong kitha nuom ding ahi. Silmanpha khu min chita, thanuam leh kipah tah in a kemjel uhi. Amol pen in zong thumna toh itate i kem hoithei zing uhi. Ipu-ipa ten mihing dai kikaij joulou ana chi uh pen leitung mit leh ngaidan ahi, ahin ei khristian ten mihing dai ki kaijou ahi chin ginna lientah toh thumna ah itate khankho ding dai ikai gige ding uhi ahi.

Happy Children's Day. ■

“Ka pienna Mang sisan ahi, gitlouna sem din ka ki phal diei? Tangtawn a um din Mangpa nang lou ngal in” - Rev Thangngur.

TATE NI (Children's Day)

- Pastornu Lunsuanchiin,

Thumapui: Naupangte Ni chithupi zang a Article giel thei dinga ka umzieh in hunmanpha hingpie iBieh Pasian min phat in umta hen. Nute Ni, Pate Ni leh Naupangte Ni khu kum chin a izah jel uh ua, zahtah leh zah ding a kilawm mawng mawng khat in zong ka lungsim ah ka koi hi. Aziehpem tam mihing thum(Nu, pa leh tate) teng kimlou in damsung hinkhuo zah khu kipahna tawm mama hi. Tua ahiman in tomkim in gentalei, tami Nite khu poimaw ngai a, ipibawl mama kisam hi. Thamlou a, amaute Ni chiet izah chieng ua, amanphat dan uh leh apoimaw dante uh kumchin a igen jel ua ahileh hinkhuo lamsau zawt ding dan theilou kaal a bawl hoi kisuoh vachi ka tahsang hi.

Mikhenkhat ngaidan in tam Ni poimawte Vaiguon izah leh alunghel/lungleng or nopmawsa tamva chitheh ahia, tuachilam pang ngaidan kohsahzawlouin, mibangzatpi in hing beisan in, shina hanmuol liam tazongle,Pasian lemguot ahiziehin, leitung pen akhang khang a peijel ding ahi zieh in, vaiguonte pibawl zaw in, idinmun dungjui a iki pahtawi tuo ua, ipoimaw dante uh ihoi theina ding ua, ikigenpi jel ding ukhu

hoi in malam sawnna hizaw ding hi. *Sia in sia atat hiem mabang in mihing in mihing ma taathiem hi.*

Gam tuomtuom in Tate Ni (Children's Day) zang:

1. Tam Naupangte Ni khu gam khangtou tamtah ten zong eite masang ah ana ngaipoimawta ua, amau gamte lemtan dan zil in hun bihie in azang chiet uhi. Kivai hawmna lienpen UN General Assembly in kum 1954 lai in Conference ah

"Na hattuum uh azawnkhal leh missionary nasepna ha bawl un"- Dr Oswald J. Smith.

Children's Day zah ding ana tangkoupita hi. Atup leh angim thupi khu: hvh

- a) Naupangte leh naupangte kikaal a kitheisiem tuona leh kizopmatna a um ding (mutual understanding).
- b) Leitung pumpia naupangte mailam hun (future) ahoi lam a khantousah ding.
- c) Mailam hun a ilamkai vaihawm dingte ahi zieh un.
- i) *China ah Children's Day khu 1949 lai in Kumteng a1st June a zah ding in ana puongta uhi.*
- ii) *Japan ah, May 5 azah ding in kum 1948 in ana puongta uhi.*
- iii) *Vatican City khu leitung pumi a Naupangte Ni mang masa pen a chiemte ahi hi.*
- iv) *Ei MELC Pawlpi in June 10 in izang uhi.*

Tun eigam India ah lut vai: India in 14 November in azang hi. Children's Day ei gam (India) a ang kipat khiet

dan tomkim in sut vai. India khang thu ah, November 14, 1889 in Motilal Nehru leh azi Swaroop Rani in Allahabab khuo a tapa khat ananei ua Jawaharlal chi'n amin aphuoh uhi. Tam mipa khu mipil theitah, laithei bai, lungsiet siem, mipawl nuom leh naupang ngaina mi ahizieh in naupangten Chacha Nehru chi'n zong ana han uhi. A pa'n pilna siemna lam a dinmun sangtah ahi theina ding in tupna lienpi toh pan analapitoujel a, tuachi'n England Cambridge University apat in MA zou in inn lam (India) angki le a, tua hun lai in India pen British vaihawmna nuoi a um analai hi. Aman mi zawng gentheite-nuoisie, musit leh totden a umte puohnatna lien tah anei a, panpi leh dopkang utna lungtang hoi zong anei hi. Aman Mahatma Gandhi toh kithuo in India Independence ana del ua, alawching ua tuachi'n First Prime Minister hina dinmun analuo hi. Eastern Philosophical

"Ka hattuum un ka ha law (salary) ang pieh zawm theilou zieh in, nusiet thei ding ahi sih hi" - Rev Dr Kh Khaizakham.

value leh Western Scientific leh Scientific thinking leh Technology Progress nading zong pan ahalah mama hi. Talent nei mi ahia, “*Great Poet*” ahi. Laigel siem leh tangthu phuo siem mi zong ahi a, ‘Glimpses of World History’ and ‘*Discovery of India*’ chi laibute a giel hi. Tuachi’n atanu Numei minthang tah Indira Gandhi in zong apa Jawaharlal Nehru laibu gielte leh a um dan (character) te apat in sil thupi tamtah ana kizil khiet hi. Tuachi’n India Khang thu ah khang son khang son a zong manghil guol hilou ding hinkhuo (record) ana umta hi.

Aman naupangte angainat guoh hilou in a ahinkhuo uh mailam hun (future) ding lampi anasiel lawh sah hi. Tuachi’n India gamah apienni 14th November pen Children’s Day chi in minvaw leh puonkhiet in a um tahi. A gen jel na ah, Naupang khu Rose Garden a Rose pah uum (pahpalh ding akisa) toh ana tekhn hi. Amaute pen, itna

leh lainatna toh kitup tah a amai lam hun uh ngaikhoh pum pum a etkaw! ding in adei hi. A zieh pen amaute khu zingchieng a Inn sung leh Nampi vaipaw dingte ahi ua ilamkai dingte ahi uhi achi hi.

Tam Jawaharlal Nehru hinkhuo leh alunggel isimkhiet ingaituo chieng in Laisiengthou toh zong akituohna a um hi. (Eph.6:4) “*Na tate uh sulungthah sih unlen Mangpa thununna leh thuhilna ah entup zaw un*”. Tam laisieng thou in, agen ut pen ahileh, itate khu ivahsa leh ichomsa or igimpi tualeh i etkaw!na nuoi a khanglien, hitama nanlezong amaute itunga lungthah thei uh ahidan ang geldoh sah hi. Tua ahitahleh, bang ichi puiding uh chipen eima sie leh pha theina (conscience) chiet ah kinga tham hi, ahivang in, Ama Pasian in kipahman a ahing pieh itate tunga ibawl dan ding khat adeidan um sese hi. I tate ahoi leh ahoilou thu hilou in, lunglut tah a ahinkhuo

“*Tulai khang khu halthana (revival) mu khalou khang (generation) ahi*” - Rev Dr Dawngza Thawng.

lampi uh leh avangam lampi ding uh kawh mu a ipui ding A dei leh atup ahi. Eima thanop danbang hijaw lou in, amaute thanopna lampi uh zawtpi kawm kawm a lamdih a pui ding chi ahi. I Mangpa Jesu'n zong lei a alenlai in (Mt.18:5) "*Koipou ka min zieh a tamnaupang neunou kipahpi khu kei hing kipahpi ahi ding hi*" achi hi. Eiten nu leh pa leh piching koipou in zong, naupang ahina uh izatatpi a ikipahpi ding uh Jesu thupieh ahi hi. Jesu'n naupangte a it mama hi (Mat.19:13). "*Naupangte ka kungah hingpeisah un, amaute khamasih un Vangam khu tambang mite a ahi*" anachi hi.

Tambang a I Mangpa Jesu'n Naupangte ana it thei leh eiten zong inn sung, kholai leh Vaiguon namunte ah, naupang thulah lou or naupang sip maimai, chia inep bawl mai leh chuh Jesu itungah kipah lou ding hi. Amaute apoimaw leh apoimaw nailou dante uh awl nou nou a kamnem

tah a hilchien a, pawngnoh sawl thaw leh phunsan mai lou a, ahina uh zatat kawm kawm a, a sil umdan hilchien hiethiet na in naupang hinkhuo abawl hoijaw dinga Asiempa zong kipah ding hi. I Mangpa Jesu nuajuiten zong naupangte ana ning bawl uhi. Hinanleh Jesu aphal sih hi chi imu bang un eiten zong itate lungsim tawnga it mai lou leh ikam a phunsan/hankhum lou a, Practical a i itna uh leh amau dinga ikipumpieh dan theisah in, chitu in amaute zong ki itsah sawm va ui. I tate ihil hil mai banah, pahtat dan zong kizil chiet vai ui.

A dieh in Naupang Ni (Children's Day) I man ua izah chieng in, amanphat dan uh genchim lou in gengen lei amau a ding in kikhelna khat Turning Point hizaw chiet va chi gintatna lienpi leh naupangte ngainatna toh tam Article ka hing giel hi. Simtute zousie, Pasian in naupangte zang in i innsung chiet uh thupha nah hing hisah taken. ■

"Pasian mun zousie a um theilou ahiman in, tuami zieh in Nu asiem hi"- Jewish Thupil.

FATHERS DAY COLUMN:

PATE NI (Father's Day)

- Mangchinlam @ Mangboi Phiamphu, Immanuel Khopi

Thumapui: Pate Ni (Father's Day) i chi khu Pate zatatna ni ahi a, tua thamlou in innsung leh khotang a anasep uleh akipumpia jou nate uh zatat a phat leh patawi ni khu ahi hi. Tuni'n Pate Ni khu bangchibang a hing piengkha; bang haam apat hing kilakhie, tukhanga ahing pieng khatdante tualeh Pate khu Bible in a gendan, a mawpuohna leh amanphatdan uh, bang chibang a Hagaulam a Pa muanhuoi leh Khrist a etton tah Pa hoi hithei ding chite saulou ikikum ding uhi. Laibu bangza e khat kaikhawm in kang giel a, mihing hina zal a gelkiel leh avalseng aum leh simtute zousie na ngaisiem na uh Jesu Khrist min in kang ngen masa ahi.

Pate ni thumal piangkhetdan leh a khiatna suina (Etymology of Father's Day): **Etymology of 'Father's Day'**: Pa ichi thumal pen thuteng ni: **"Pa"** leh **"Ni"** hing kigawm khawm ahi. Tami thumal **"Pa"** Father khu **Old English "Faeder,"** tuami pen Proto-Germanic **"fadar"** apat hing ki lakhia in, tualeh Proto-Indo-European thubul **"pater"**, apat hing kilakhia father khu **"Pa"** chi a hing kiladoh ana hi hi. Malai

in zong: **Latin** ten: *pater*, **Greek** ten: *Pater*, **Sanskrit** ten: *pitar*, a nachu uhi. Aban ah, Ni ichi thumal khu Old English **"daeg"** apat hing kilakhia ahia, agenut ahileh dakal sawmni leh li hunsung agenna ahi. Tami thumal kigawmkhawm **'Father's Day'** in agen ut ahileh **"Pate Ni pen amaute zatat ni, amau ni a ensa hi"**. English a possessive apostrophe (') Father's in mani a (kei a, nang a), tamna ah Pate Ni agen chiengna anahi hi. Mi

khenkhatte ngaidan in Bang dinga Fathers or Fathers' Day kichilou ahiai? Fathers kichi tahleh English a grammar dihloou hiding a, tuathamlou in Minlawna ni a kizom a thugualkhat a kijui leh mimal a, ahijieh in apostrophe "s" in amasa pen ajuizing ding ahi chi ithei angai hi. Bang zieh a father's kichi ahia chi dawnna piehna dinga igen ahi.¹

PateNihingkipatkhiendan (*Origin of Father's Day*): Sonora Louise Smart Dodd khu William Jackson Smart leh Ellen Victoria Cheek Smart te tanu tapen ahi. February 18, 1882, in Jenny Lind Arkansas ki china mun United States ah napiang hi. Naupang neu ahilai in a innkuan un, Spokane mun Washington khopi a ana pemlut uhi. Sonora in pianpih pasal nga anei a amachou numei anahi hi. Kum sawmlehguh apha in anu'n nauneina (child birth) ziah in ashi san tahi. Apa, William in gentheinate leh hasatnate thuoh in atate ahing enkol tahi. Tuachin William pen atate ading in Nu-le-pa

anghita hi.²

Kum 1909 in Nute Ni kizatna munkhat a avatel tahi. Tami hun a Nute phat-le-patawi a umkhu amuta hi. Amanu lungsim ahingkhoei Khama ma ta a, Pate Ni zong Nute Ni banga bawlding in pan ahingla tahi. Tuachin June 5 khu apa birthday pen Pate Ni a zatding in lem ahing sah tahi. Hunte hoilou zieh in June 19, 1910, ni khu Church te, Local officials te leh Young Men's Christian Association (YMCA) te phalpina toh khopi lah ah ahing phuongkhie tahi. Miten, Sonora ngaidante hanthawn leh tawsot in, tuachin USA gamsung a Holiday ahing hithei nading in pan ahing lata uhi. Hunsawt pi ahing peinung Kum 1924 in President Calvin Coolidge in Pate Ni khu manding ahi ana chi hi. Tuazou in President Lyndon B. Johnson in zong Presidential address a, Pate Ni zatat a ani manding ahi chi'n 1966 kum in phuongkhie hi. Tuachin 1972 kum in President Richard Nixon in June hasung a Pasian ni athumveina (Third

"Nu buching hi theina ding alampi um sih a nanleh alampi million khat a um thei hi" - Jill Churchil.

Sunday of June) khu National holiday hidin aphuangkhe tahi.

Sonora Smart Dodd khu Pate Ni phutkhetu anahi a, kum sawm kuo leh guh (96 years) apha in 1978 in a hinkhuo ana beita hi. Ama ziehin Pate Ni pen tuni tandong in khovel pumpi in Father's Day ana kizang hi.

- a) United States, India, United Kingdom, Maxico, Japan, Canada ten June hasung Pasian ni athumna penkhu Father's Day ni in a zang uhi.
- b) Katholic (Catholic) gam khenkhat Spain leh Italy ten Jesu pa, Saint Joseph zatatna in March 19 ni in a zang jel uhi.
- c) Australia leh New Zealand ten September Pasian ni masa khu ana zangkia uhi.

Tam chibang ma in gam sawmkua leh sagih kiimlah velten tutan in Pate Ni pen ana zang chiet uhi.³

BIBLE IN PA (FATHER) A GENDAN: Bible in Pa agendan ahileh Lamkai muan

um, itna nei, ki thununzou mi leh Hagaulam a vengtu leh puitu chin ana gen hi. Van a um i Pa uh Pasian in ama ngel zong Pa ana kichi hi. Bible in, a gendan tamlou a Bible ma zang in tamlou envai:

1) Hagaulam a lamkai: Ephesa;6: 4 na in, “*Tuahleh nou Pate aw, natate uh, suh lungthah sih unlen, Mangpa thununna leh thuhilna ah entup zaw un*”. Tami Bible chang in pate pen Hagaulam a tate zilsa leh Nunnem tah leh dawzou natoh Pasian thu a puiding in ang hilchieng hi.

2) Hepihna leh itna nei: Late 103:13 na in, “*Pa in tate ahepi bangin, Mangpa’n Ama ging mite ahepi ngitnget hi*”. Tamna a innsung pa khat in atate a it leh Pasian itna khu ama kung a umzing a, tua thamlou in ahepina leh khotuona khu ama’n a vomzing ding hi.

3) Pasian umdan ennton mi: Matthew 7:11 na in, “*Tuachi ahileh, nou migilou in bawn na tate uh sil hoi piahna dan na thei uhleh, na Pa uh*

“Nu’n a khut in atate tomnou sung atu/ atawi a nanleh kumtawn in a lungtang atu zou hi”- **Unknown.**

van ah umin akunga ngente sil hoi petham lou ding ahiai mah? Tami Bible Tang in agen ut ahileh, Pate pen van aum i Pasian in eite ang kepching leh kemhoi bang a, veng leh kemding a lamet ihi uhi.

PATE MAWPUOHNA (*Role and responsibilities of fathers*): Pasian thei mi Pa khat pen innsung, hattuum leh khotang a ama mopuona akithei chien mama hi. Pate mawpuonate tamlou i enn ding uhi:

1) INNSUNG AH (Family):

a) Hagau lamah Innsung lamkaitu leh vatuh: 1Timothy 5:8
na in, “Hinanleh koipou in ama mite adiah in a innkuanpite ading ngaituohlou mi khu ginna nual ahi a, ginglou mi Sangin asezaw hi” achi hi. Tamin a genut ahi leh “Pa khat in a innsung tahsa leh Hagaulam a apoimaw bangzel a a innsung a et kaiding leh Pasian thu toh apuiding ahi”. Tua thamlou in **Joshua**

inzong “hinanleh keileh ka innkuanpiten vang Mangpa nna ahi ka sep ding uh achi hi” chin ana gen hi. **Wayne Grudem** in a laibu gel ‘Biblical foundations for Manhood’ a hichin anagenkia hi, “Pasian in Pasal pen innsung a, mopuona zousie leh lamkai hina zousie pozou dinga siem ahi” ana chi hi (cf. Ephesa 5:23).

b) Thuhiltu leh kithumun zoumi: Thupilte 22:6
na in, “Naupang apei nading lampi ah chilin, a upat dawngin zong tuate akipat in apeimang sih dinghi”. Bibleaimubangin Pate’n itate uh Pasian lam ah thuhilding leh lamkai zing dingkhu i mawpuona uh ahi. American gam a Bible siem a minthang **Jonathan Edwards** ki chipan, “Pasian thu pen innsung ah thumna leh bible thuteng zilsahna in tate maban a, lamkai thupi leh zatat huai ta hingtun hi, nachi hi”.

“Naungeh apien chet leh, Nu zong apieng hi; tuami masang in ana um sih hi”- **Rajnesh**.

c) **Itna hau pasal leh zite etton thei: Ephesa 5:25** na in, “*Pasalte aw, Khrist in hattuum a itt a, ataang ua akipieh bangin nouten zong na zite uh itt un*”. Tamna a ang hilchien ut ahileh zi-le-pasal ki-itna in, innsung nuom, hoi leh innsung damna a hing pieng sah hi. Tuazieh in zi itna khu innsung damna ding lampi hoi khat zong ahi. Paul in zong **Timothy** kunga, “*Sil zousie ah nna hoi sem a etton dingin nangma kimusah inlen, thugen ah sietna a umlou dan, azatat huoi dan leh asetheilou ahidan kilangsah in*” anachi hi.

d) **Hanthawn leh panpihtu: Kolossa 3:21** na in, “*Pate aw, na tate uh lungthahsah sih un, tuachilouin alungke kha ding uhi*” ana chi hi. Tate pen bangma a siemna nei nailou ahiman in thunun natoh awnem tah a hil masat ding ahi. Tuaban ah i tate Pasian thu lam ah hanthawn leh thuhil

zawding ahi. **John Piper** in “*Pate pen innsunga hagaulam lamkai leh mawpuona zousie pawtu leh thuhiltu muanhuai Pa ahi uhi*” ana chi hi.

2) **KHOTANG AH**
(Community and Society):

i) **Gamtat khohei a mite etton:** I hindan leh umdan mite zatat theiding leh etton thei ding a um ding ahi. **Bible** in “*Na vah uh mite mu dingin vah heh, tuachi’n na silbawl hoite amu thei ding ua, Van a um na Pa uh apahtawi thei ding uhi*” ana chi hi. Pa pen innsung gua a lamkai hilou in khotang a zong gamtat leh khohei a, mite etton ihi ding uh ahi. **John MacArthur** in “*The fulfilled family, 2005 Laibu ah, “Pate pen hattuum lamah; siengthouna, guntuhna leh ginumna anei banga, khawtaang a zong anei ding ahi*” chi hi.

ii) **Pa dangte leh khanglaite etton:** Mite

“Pate pen innsunga hagaulam lamkai leh mawpuohna zousie pawtu leh thuhiltu muanhuai Pa ahi uhi” - **John Piper**.

kunga Pasian thu manphat leh hoidante hanthawn ding ahi. Paul in Timothy kunga, Hinanleh hamkam suoh ah gamtat dan ah, ittna lam ah, hagau lam ah ginna lam ah, sienthoua lamah gingtute etton ding hizaw in chin ana hanthawn hi. Tua banah Khristian Psychologist minthang mama **Dr James Dobson** in “Mikhat in thu zakhat vei thupoimaw agenthaw sang in, Pa khat in Gentena khat apiah amanpha zaw hi” ana chi hi. Pate pen midangte etton theidinga, um leh gamtat ding ahi zaw hi. Tuah hileh Pa dangte leh ahing khanglien ding khanglaiten etton tah hing sahding uhi.

iii) **Midangte poimaw hun a panpitu: Galatia 6:2** na in “Khat leh khat na puohgihte uh ki dawnchiet un” ana chi hi. Tuajieh in koima khentuom neilou a kipanpi tua chiet khu Pasian deidan ahi. **Dr Howard Thurman** in

a laibu gel khat ah, “Pa hoi leh muanhuai khat in ama innsung guo hilou in midangte poimaw bangin, kithununna neitah in midangte a panpi zel hi” achi hi.

3) HATTUOM AH
(Church):

i) **Hagau lam ah lamkai leh etton:** 1Peter 5: 2-5 na in hichin agen hi, “Na lah ua Pasian belam pawl umte ching hoi un aloutheilou ahi zieh hilou in, na utzieh uh hizaw in, punna dihlou dei zieh zong hilou in, sepding kilawpna in hi zaw heh” ana chi hi. Tuazieh a hattuum a lamkai hoi leh ginum Pa khat ihi thei nadingin angma khualna, duhamna, lungsimsietnate koikhiat ding ahi.

ii) **Nasep utna leh panpih utna lungtang puoh:** Peter laithot in “silpieh na mu bangbang un nna kisepe pi tua chiet un” achi mabang in eiten zong Pasian apat talent inei

“Pate pen hattuum lam ah; sienthoua, guntuhna leh ginumna anei banga, khotaang a zong anei ding ahi” - **John MacArthur.**

zousiete mite panpi utna a izat apoimaw mama hi.

Zilsahtu leh hattuum a ki pezou: 2Timothy 2:2 na in *“Theipitu tampite lah a ka thugen na zahte, mi muonhuoi, midangte zong hilsawn thei ding kungah kemsah in”* a chi bang in Jesu Khrist khantanhoi thu pen mite lah ah phuangza ding ahi. **Gordon D. Fee** in commentary laibu khat ah hichin ana giel hi, *“Timothy nangpen muangtah leh ginum tah a Jesu Khrist tanchin mite lah a pulah dinga quat nahi”* chia ahanthawn bang in eite zong muongtah a ngansie ihi uhi.

BIBLE A PA GINUM KIGENTE

Bible a Pa muonhuoi leh ginum kigente koite ahiai:

i) ABRAHAM: Ginna adim Pa muanhuai chi ahi, Siemchilbu 18:19 na in na hilchieng mama hi. Abraham in Pasian amuong a hasatni in zong ataisan ngaisih hi. Tua thamlou in zong a innsung

mite ditatna leh ginumna toh Pasian lam ah amapui zing hi.

ii) JOB: Hagau a etton Pa ginum, Job 1:5 na in ah innsung a asil bawlkhielte uh zingmawng teng in Pasian mai a maipha a hawl gige hi. Tawplou in athum a, tua thamlou in Pasian mitmu a ding in Nualnabei (blameless) leh miditat khat zong ana hi.

iii) JOSHUA: Innsung a lamkai muanhuai ana kachina zieh bang ahiei ichi chieng in 24:15 na azong kei leh ka innkuon piten vang mangpa nna bou kasem ding uhi ana chi hi. Tua thamlou in Israelte kum sawm li a saltang zounua un gamchiem gam (promised land) Kannan ah ana pui hi.

Tunia laibu tuomtuom leh Bible version tuomtuom apat ikaikhawm Pate Ni toh kisai hiteng igen ding a, simtu zousie in na phattuompi uh ka lam en a, tukum Pate ni tungtawn apat in, innsung

“Khristian khat a dingin, kingiemkhietna alou theilou ahi, tam kingiemkhietna in, mimal kitheichietna, Kisiana, Ginna leh Hundamna kichite ah pang thei lou ahi” - By A. W. Tozer.

ading in pan atha a la ding
in ka hing hanthawn hi.
Tualeh Pate, tami article
tungtawn ah phattuumna
lienpi neithei ding in Pasian
in na innsung chiet uh hing
gualzawl taken.

Simtute zousie na un pih un
Pate ni chibai! Happy Father's
Day chi'n zahna salam kang
bawl hi.

End Note:

1. Ralph LaRossa, *The Modernisation of*

Fatherhood: A Social and Political History (Chicago: University of Chicago Press, 1997), 275-292.

2. Ruth A. Martin, "The Founding of Father's Day," *Journal of Family History* 11, no. 3 91986. 257-263.
3. Robert J. Myers, "Celebration: The Complete Book of America Holiday" (New York: Doubleday and Company, 1972), 184-187. ■

PA CHITAH & A MUOPHUONA

Tangtel: "Tualeh nou Pate aw, na tate uh, suhlungthah sih unlen, Mangpa thununna leh thuhilna ah entup zaw un" (Ephe. 6: 4).

Thumapui: Kumteng in Pate Ni chin leitung pumpi'n June, Pasian Ni thumna (*Third Sunday of June*) akizang zing hi. Tutung a Pate Ni toh kisai in "Pa Chitah & A Muophuona" chi thupi pansan in kikum khawm vai. Simsuo nailoupi'n phun sinlen, simsuo phawt mawngmawng in, na phattuompi khamoh sih diei ma!

PATE MOHPUOHNA:
Pate mohpuohna toh kisai in
thupi ni kang talang nuom
hi. Tuate ahileh:

a) Tate suhlungtha lou ding: (Ephe. 6:4, Kol. 3:21).
Tamna Laisiengthou tang
kipete giel in agetnuompen

"Mikhat in thu zakhat vei thupoimaw agenthaw sang in, Pa khat in Gentena khat apiah amanpha zaw hi" - **Dr James Dobson.**

ahileh, “*Tate Pasian deina banga kep zing ding*” chi ahi. Eph. 6:1-3 na sungah Tate’n nu leh pa thu man ding dan agen masa hi. Paul in Ephesa Hattuum a Pate kunga aget thupipen ahileh, “*Tate tunga nu leh pate mohpuohna khu, i tate Mangpa thununna leh thuhilna a etkawl ding ahi*” chi ahi hi.

Thupil khat in, “*Tate toh hun zatkhawm khu tate tunga Sum tampi seng sangin ahoizaw hi*” chin agen hi. Tulai Pa (nulepa) tampi’n a tate laisiemna ding bou abuoipi ua, athupipen leh amanpha pen a Hagaulam hinkhuo ding buoipi nu leh pa avang mama hi. Pa innsung apat vamang tampi igam in ineita uhi. **Pasian in Kumpi Hezekiah** kunga, “*Na innsung siemtup tan dam joulou a shi ding na hita hi*” chin (2Leengte 18:5). Aman a mohpuohna innsung sangin a gamsung leh mipite agelkho zieh hidia suikhiet ahi hi. **Ken P. Canfield** in, “*Pa tahtah ten Pa chi khu hina min maimai in a gel sih*

ua, nasep theina in azang uhi” chin agen hi. Pa khu hina (Title) hilou in mohpuohna ahidan agetnuomna hizaw bou hi. **Laibu Khat** in, “*Ei Khristian Pate vang Ta neiding mai hilou in, Hagaulam a i tate enkawl ding (spiritual fathering) a mohpuohna pieh a um ahi*” chin akigiel hi. **Gordon MacDonald** in, “*Khovel a Pa tampi a um a, hinanleh innsung enkawl tahtah pa tawmnou ahi, ta nei dinga nupa hina a sepding uh Pa zousie in atheisuoh ua, hinanleh Pa tahtah hina khu tahsa lam a ta nei guoh ahi sih hi*” chin anan gen hi. **Job** in, “*Zingmawng tengin a tate adin Maitam abawlpi zing hi*” (1:5). Pate aw, tunin na tate kepdan pilvan hun, na ta hina chiA na moh phawphaw leh na tate delmang na hi kha thei (zaw ding) hi. Tua ziehin Pasian deina banga lungkim sah ding khu kizil tava.

b) Pasian thu toh Thunun ding (Eph. 4 b):

Tamin agetnuom pen ahileh, “*Lamdih a pui ding*”

“*Pasian in Pasal pen innsunga, mohpuohna zousie leh lamkai hina zousie pozoudinga siem ahi*” - **Wayne Grudem**.

(discipline) agetna ahi. Laisiengthou in tate Pasion deidan a kepding ahidan agente ahileh:

- i) Na tate aneulai un Pasion kungah ap in (1Sam. 1: 28, Luk 2:22),
- ii) Na taten abawl zousie uh Pasion in chiemte/ melchi ahidan hil in (Late 139: 1-2).
- iii) Pasion in na tate a itdan, amaute adia tupna nei ahidan, hil in (Luk 1:13-17, Rom 8:30, 1Pet. 1:3-9),
- iv) Na tate Pasion deidan in aum na uai, a Ginna uh ahatzing na dingun, nang khu a etton ding in um inlen, itna leh lainatna toh kem in, chin Paul in agen hi (Phil. 1:27).

Gary Chapman in, “*Tate etkawlna ah kangtalai lim 2 toh gente hi, tuami ahileh thuhilna leh zilsahna ahi a, atai hoi theina dingin kangtalai thau khu itna ahi. Bang chi bang zilsahna nei zong lei, na tate’n na itna atheichet lou uleh apthatuom lou asuo ding hi*”

chin agen hi. Tualeh **Chuck Swindoll** in, “*Tate hoilouna khu Hattuum akingoh a, tami sih dih hilou ahi. Na innsung a na thuzawlou zieh hizaw bou hi. Eiten innsung a i thuzawlou i tate khu hattuum Lamakaite’n (Pastor, Upate) athuzaw ding dia i ngaisut na uh pen adihlou ahi*” chin agen hi. Na tate na innsung a na thuzaw ngeingei leh heimun ah um ulezong na thuzaw jou dinga, nanleh na thuzawloute Pastorte, Evangelistte leh Pasion nasemten theitop hing suopi nan ulezong, nisim a a umpi nang apan pan nalapia mateng kikhel lou ding uhi. **Dr John R. Rice** in, “*Ka tate piengthalous pia zinei-pasal nei a ka hakhiet sangin, piengtha uh henlen shi uleh ka deisah zaw hi*” chin agen hi. Nang nan ate nakepdan toh bang chi na sah ei? Miten atate pientha ding ngaikhaw mama uhi. Nang na tate sangin SUM ngaikhaw na hi zieh a na tate piengtha lou uh hileh hi.

Akhupsitna: Pi John

“Pasion thu pen innsung ah thumna leh bible thuteng zilsahna in tate maban a, lamkai thupi leh zatat huai ta hingtun hi, nachi hi” - **Jonathan Edwards**.

Bruce Dudd piena Pa hoina, chitna te zieh in leitung pumpi'n "**Pate Ni**" zat ding ahi chia apuokhiet ngam laiin, nang na taten nang a pat bang azil khe diei? Noah in, "*Tuizin akipat a innsung mite ahunkhie hi*", Nang Sietna akipat na innsung mite (adia in na Tate) na hunkhe jou diei?

Kingaitua pha in. **Kumpi Hezekiah** khu a gam leh Nam adia Pa chitah, etton tah ahi, hinanleh Pasian in, "*Hezekiah na innsung siemtup tan, dam dohjoulu a shi ding nahi*" chin agenpi hi. Pasian in "*Khotang leh Chi-le-Nam sangin Innsung ngaikhoh zaw ahidan*" achieng mama hi. ■

PATE NI

Pastor T. Chinlunmang, Biel Pastor, Singngat Division.

Amasa pen in Tangkou simtute Jesu min in chibai kahing bawl hi. Leitung a mihing koima Pa umlou a piang a umsih a, apa kitheilou ah hing piang naungehte zong a pa um veve ahi. Pa umlou a koima a piang aum lou bangin Pate kunga zong Pasian in a pieh vangletna um ahi chi taten ithei ua, tuami vangletna tang dinga I pate chiet uh zatat a ahing teh chieng ua zong hoitah a kem leh enkol dingin pan lachiet va ui.

PATE NI HING PIANGKHIET DAN:

Europe gambup a Catholic te laha Pate Ni pen middle age hun lai apat March 19 ni "Feast of St. Joseph" Jesu pa zatatna in ana jang uhi. Tami pei dan pen America a hing lut Spanish leh Portuguese te hing pawlut in tutan March 19 ni Latin

America gam ten a zang nalai uhi. America gama Pate ni masapen Williams Methodist Epicopal Church, South in Fairmont, West Virginia a July 5, 1908 in Mrs. Grace Golden Clayton panlahna in ana zang uhi.

Pate Ni thupitah a izat theina dinga pan analah ahileh Mrs.

"Thudih sanga Khristianna ngaisang tuin, Khristianna sangin ama Hattuum a ngaisang zaw ding a, atawpin ama a kingaisang ding hi" - S. T. Coleridge.

Sonora Smart Dodd ahi. Kum 1909 a Nute ni kizatna a Sermon a ngai apat Pate zong tawisang tah ahi dan ahing thei khia a, apa William Smart in anu umlou nua a ama uh unau 6(guh) apa'n anu tellou a, a etkol dan thupi sah in Spokane Ministerial Association leh YMCA te kunga Pate Ni bawl dingin a ngetna nei in June 5, apa pianni a bawl dingin angen hi. A deidan in mipi gupna nga in, hinanleh ahun pen khel dingin Ministerial Association in ngetna bawl in Spokane, Washington a June 19, 1910 (June hah a Pasianni thumna) in Pate ni lopna masapen hing kibawl in, a ban Kunteng in mun tuomtuom a zat in ahing umta hi. Kum 1913 in US Congress a Pate Ni National Holiday hi ding in US President Woodrow Wilson panlahna in bill aki polut a, 1966 in President Lyndon Johnson in June ha Pasianni thumna (3rd Sunday of June) pen Pate zatatna pia ni hiding in thupuan abawl a, 1972 in President Richard Nixon in June ha Pasianni thumna pen

Pate ni hi dingin asuai akai a, US gam a dan hing hi in holiday (khawlni) in azang uhi.

PATE NI IN NAPA BANG NA PE DIAI!: Pate ni ilop chieng un khanglaite'n I pa bang pelei kipah pen dingin na gingta uai!. Na pa'n nang apat bang silpieh aki lam et diei? Tu a I dinmun koi zieh a tung ihi uai! Pate'n tate apat sum-le-pai, sana dangka a lamen sih ua, taten Pa thu ngai a, I lungsim sunga ahing thuhilnate kep ding khu a deipen uh ahi. Sum-le-pai, sana dangka te nang lamsa hilou ahi, Sepna hoitah ha sum tampi koi jieha na mu e! Pate'n tate apat leitung nei leh goute a lam en sih uh "Ka tapa na lungtang hing pie inlen namit in ka lampite en hen" (Prov. 23:26) "Ka tapa ka thuhilna manghil sin len, ka thupiete na lungtang in kem heh (Prov. 3:1)

Pate Ni a i pate kipahna ding in sum-le-pai, sana dangka hilou in I lungtang ua ahing thuhil nate kep a jui ding ahi, athu na jui sang a napa kipah sah jaw ding sildang a um sih hi. ■

WIDOW'S DAY COLUMN:

MEITHAITE NI (Widow Day)

- The Rt. Rev Khup Do Khen, Bishop

I Laisiangthou ah Meithaite thu akigen khah pou pou chiengin, a kepding dan toh getkhawm in a um zing zing hi. I Laisiangthou in Meithai chia agen te khu, ei lah a Meithai chia iminvaw te tawh akibang thei khawl sih hi. Pasal neilai Numei khat, apasal in a shisan tahchienga, amanu zong peinading leh suhna ding theilou a genthei tah leh lungkham mangbangtah a hinkho mangte genna ana hi deu hi.

Tuabanah, nidanglai in Numei ta pasal neiloute khu sim maw in ana um uhi. Apasal in ashisan dieh dieh leh, simmawna atungah alien semsem hi. Khumi numei don leh kem ding a pasal lah shita, tapa lah neilou ahitah chiengin, Khotang hinkhua ah mite simmawna lienseng ahidan Pasianin ana thei ziehin, Meithai tagate Pasian ka hi ana chi hi.

“...tualeh na huongsung ua um gamdangmi paneiloute leh MEITHAITEN ane ding ua, ahing khosa thei ding uhi, tuachin Mangpa na Pasian un na khut nasep leh silbawl zousie uah ahing guolzawl

thei ding hi.” **Danpiehnina 14:29**; “Tualeh Mangpa na Pasian un Amin umna dinga a guotna mun dingah, na suohpate uh, na suohnute uh, na khopi huongsung ua um Levimite, na lah ua um gamdang mite, pa neiloute leh MEITHAITE toh Mangpa na Pasian uh masangah nuomsa tahin na um ding uh ahi” (16:11). “Na olive singte uh na sat chiengun, abate na sat ding uh ahi sih hi, tuate khu gamdang mite, Pa neiloute leh MEITHAITE adding ahi ding hi” (24:20; 26:12). I Laisiangthou in Meithaite khu zatatna leh lungsietna tawh kep leh etkol

“Dihna zekai sahtu khu dihlouna ahi gige hi” - Water Landor.

ding ana chi hi. A hatlouna te uh leh a theilouna te uh zieha, eite'n, isolthop leh etneu ding hi mawng mawng lou ahi hi.

“Pasian a umna siengthou a um khu Pa neiloute pa leh meithaite kembitpa ahi” (Late 68:5). Tuabanah, Pa neiloute leh meithaite khu ilungsiet ua, atung ua ginum tah leh thudih a vai ihawm pieh ding uh ahi.

“Gamdang mite, Pa neiloute leh meithaite dihrou taha vaihawmpieh mi, hamsiet in um heh achi ding ua, Mipi zousien Amen achi ding uhi” (Danpiehnina 27:19).

“Na lou ua bu na atchiengun, loulai a buphai na manghilte uh, na nua lah kia nawnlou ding uh ahi; tuate khu

gamdang mite, pa neiloute, leh meithaite ading ahi ding hi, Mangpa na Pasian un na khut nasep zousie uh ahing guolzawl theina dingin” (Danpiehnina 24:19).

Thuhuntha hun ah Pasian in meithai te khu Hattuum in ngaisahna leh itna tuombih anei ua, a etkawl ding un adei hi. **1Tim.5:4** A enkoltu ding umlou meithai khu Hattuumten apum etkol mai dingin Sawltak Paul in agen hi. **1Tim.5:9-10**. Pasian in meithaite khu hepina leh itna sangtah toh aetkol zing lai in, ei gingtute'n jong meithai taga enkolding neilou leh migentheite khu ihapi ua, antang jong ipiehzal ua, meding jong ipieh zel ding uh ahi hi. ■

MELC INNSUNG THU

1. ELWA SHILLONG TEN ONE DAY SEMINAR NEI: Apeisa date 10th May ni in ELWA, Shillong ten “Thu leh Numei” chi thupi pansan in One Day Seminar anei uhi. Tam hun ah Resource person in Pastor Hausawmlal, Local Pastor apang a, tam hunkhu Hun 2 in a khen ahi. Hunpatna din Upanu Thanglunniang in thumna nei in, Nuomthu genna Nu Vungching, Chairperson in hun azat jou in, Upanu Khanniang in thumna nei in lawchingtah in vaiguon jou uhi.

“Kilim bawlina khu mutheilou a khelna hing (live) gige ahi” - John Milton.

2. LYF GHQ IN “NIANGTUI SAN” HONNA VAIGUON NEI: Apeisa nisim 15th May, 2025 (Thursday) in LYF General Headquarters Inn tena toh Martin Luther Hall, MELC Office mun ah Department of Industry nuai a kibawl Singpi te “Niangtui San” honna vaiguon ana nei in aum hi. The Rt. Rev. Khup Do Khen, Bishop MELC in Pasian mai ah alatna anei hi. Tami Niangtui San ahileh LYF in maban a ki toudel thei na ding lunggel toh kumteng a peipi sua ding leh sum nah, income generate theina khat hiden ding maban a LYF ama leh ama akitoudel theina ding ngiim na toh hing ki bawl khia ahi.

3. LCF HUNDAMNA CAMP LAWCHINGTAH IN NEI UH: Apeisa 24-27th April sung teng Bethel Chapel Hiangzou MELC innte na toh Nehemiah Prayer Mount, Muallvaiphei mun ah LCF Hundamna Camp nei ahia, Camp Director in Pastor Dr M. Thangboi Zou, Biel Pastor LED apang hi. Camp Thupi: “Tate ka va a ka khangliansah hi, hinanleh ka tung ah ahelta uhi” (Isai 1: 2). Speaker in Remnant Ministry Team te mi 14 ten Camper 71 te Pasian thutah hilna anei uhi. Pasian zal in tam Camp 70% bang lawching a thei ahi hi.

4. MOREH DIVISION TEN DIV. OFFICE DING LAM: Thu kijah dan in Moreh Division ten, Division Headquarter Moreh mun ah “Division Office ding lampen ta chi thu akija a,” Pasian mapuina toh lawchingtah a ang zaw siengna ding un l tumna uah thei chiet vai.

5. LYF/ LED TEN ONE DAY SEMINAR ZANG UH: Apeisa Date 10th May in Lamka East Division LYF ten “Ethical Issue Faced by Christian Youth in Post Modern Society” chi thupi zang in One Day Seminar, Ebenezer Church, Ngulzen Veng mun ah anei uhi. Tam hun a Resource Persons in Evan. Dr David G. Tungnung leh Tv. B. Goumuanthang M. Th pang uhi. Seminar pen Hun 2 a khen ahi hi. Seminar honna Pastor Dr M. Thangboi Zou, Biel Pastor in anei a, Vaidawn thugenna Pa Mangliansang, Div. Chairman in anei a, First session khana leh Singpi latna Evan. Thangkhanpiang in thumna anei hi. Nuomthu genna Pa Samuel Mangbiaklian M & R in aneizaw in Pastor Dr M. Thangboi Zou in Seminar khahna anei a, lawchingtah leh kipahtan in vaiguon azang uhi.

6. LYF GHQ TEN ONE DAY CAREER GUIDANCE SAI: Apeisa Date 23rd May LYF General Headquarters in LYF Lamka East Div. inntehna pia in Career guidance Pawl 10 leh 12 zou tha te ngaituo na toh Career guidance vaiguon Simveng, MELC mun ah nei uhi. Tami vaiguon ah Session 3 a khen in: Session 1 na ah: Youth & Christianity: By The Rt. Rev. Khup Do Khen, Bishop in la in, Career in Medical Field: By Dr. Langlunthang Medical Officer, tualeh Career in Banking: By Pu M Paulunmang Zou, SBI PO in la uhi.

Tami hun ah vaiguon honna Pastor Dr. M Thangboi Zou (Bial Pastor, LED) in hing neisa in, Host Pu Mangchinkhup (Secretary, LYF Lamka West Div), Recording ahileh Pu Thangminlun (Secretary, LYF LED) in la in, Vaidawna: Pu Gouminlian (V-Chairman, LYF Lamka East Div.), Tualeh Kipah thugenna: Pu P Khamminlun (Chairman, LYF GHQ), Vaiguon Khahna: Rev. Nengkhanlal Milun (DS Lamka East Division) in anei hi. ■

.....

“Khovel ngiemkiena lah a hoilou pen khu, miten kilawpna amansuona uh ahi”
- H.W. Arnold.

SUUNNA:

(L) Rev T. KAMSUANLAL TANCHIN TOMKIM



Phamta Rev. Kamsuanlal @ T. Lalpu ahileh Pa Thangkhan-mang leh Nu (L) Chiinkhoching te tate lah a anga na (5th) ahi. Amah 9th Sept, 1970 in M. Tanglian khuo ah apieng hi. Akhantou tunglai in lasa leh music lam a talented mama khat ana hi a, Zomi Fin's Band ah zong Lead Singer khat in ana pang hi. Zogam dung leh vai ah mite ana limsah leh halsah mama hi, haam leh pau Chii leh Nam ngaina ahi man in (L) Rev. S Chinkhanpau inn pansan in Thangkhal Sinlai Pawlpi (TSP) 1987 in ana phutkhete lah ah khat in anapang hi. TSP Founding President leh Founder of TSP Title zong ana kipe ngai hi. Kum 1996 in azi ittah lasah talent nei mama Nu Lunsuanchiin D/o Pa (L) Kamchinkhup leh Nu Niangzachiin of Khuoinuoi toh ana kiteng uhi. Azi toh Pasion guolzawlina ta numei Bliss Chinghatnang leh ta pasal Loveson Manglamlian nei uhi. Tualeh ta pasal khat Thomas Pausuanlian adopt uhi.

Bible zilna lam ah:

- a) 2005 Kum in Asia School of Theology, Bangalore, India, "Bachelor of Theology" (B. Th) ana jou hi.
- b) 2021 in Asian Baptist Bible College and Seminary, Bible Hill, Rengkai, ah "Master of Ministry" ana joukia hi

Pasion gam nasepna lam ah:

- a) Kum 18 December, 2025 in ordination a la hi.
- b) Kum 2009-12: Interdenominational Pastor, Chaplain in MELC Delhi ah asem hi.
- c) Kum 2013-14: Behiang District, Suongphuh mun ah ana posting hi.
- d) Kum 2015-17: Biel Pastor in, Singngat Division, Phaibem ah ana posting hi.
- e) Kum 2018-2020: Local Pastor in SLC ah ana posting hi.
- f) Kum 2021-23: Thanlon Division, Leijangphai ah ana posting hi.
- g) Kum 2023 to 21st May, 2025: Sangaikot Division ah Divisional Superintendent hina atu hi.

Asepkhiet te:

- i) Kitenna 11 sang a tamzaw ana bawl hi.
- ii) Baptisma mi 17 sang a tamzaw ana bawl hi.

A muan Mangpa Pasion in adam kumding a aguatsah bang in Date 21st May, 2025 nitalam Nai 08: 20pm tandong in Pastor nna, Divisional Superintendent (DS) Sangaikot Division mun a sem pumpum in District Hospital Churachandpur ah aleitung hinkhua bei in, asiampa Pasion ang ah a tawldam tahi. Akivuini in The Rt. Rev Khup Do Khen, Bishop in hanthawn thugenna anei a, Rev Kamminthang DM& E in hakhietna nei in Rev Nengkhanlal Milun, DS/ LED in vuina anei hi. ■

Mangpa Jesu uplouna mun zousie khu Gawtmun ahi a, Mangpa Jesu upna zousie Vangam ahi- William Barclay.

If undelivered, please return to
The Editor, Gospel Tangkou
MELC Office, Hqtr. Zomi Colony
Post Box – 10, Churachandpur 795128
Manipur, India,
e-mail: melcqrts@mail.com

Gospel Tangkou (Gospel Herald)
RNI Regd. No : 62170/95 MNP 76
(Hachin a kisuo, hattuom khanletna ding)

Printed at



Convention Book House
Dorcas Hall Campus, New Lamka

BOOK POST

To

.....

.....

.....